

寶祐重修琴川志

重修琴川志卷第七

叙兵

縣有弓兵有寨兵此定制也中興以來規相要害增置列戍則有大軍焉常熟瀕江近海地嚴控扼列峙舟師於是有許浦之屯前衝後擊實相犄角於是復有顧涇之屯兩屯相望雄據江潯而規模宏遠矣近年忠節軍之置又所以增備苴闕而弓兵寨兵等則縣之所依以立者皆非可以具文視也故作叙兵

許浦御前水軍

建炎紹興間水軍嘗戍江陰及許浦福山諸處無一定之所乾道六年初自明之定海分屯于此旣而御前水軍統制馮湛奏臣躬親相視海道控扼去處數內蘇州許浦鎮實控扼之要港汊深遠可以安泊舟船土地高廣可以安

立寨柵比之江陰屯駐之地公議差勝且去淮甸不遠斥
堠相連易於探報比之定海駐劄之地尤為良便乞於許
浦鎮屯駐大軍合用寨地委平江府差官與本軍同去許
浦踏逐標撥并教場地步施行四月九日三省樞密院劄
付平江守臣汪應辰遂差委常熟縣丞秦煒同水軍統制
差來使臣踏逐寨地間今據所申遷定合立寨基其所指
地段並係人戶居止屋宇及埋葬墳塋包占田土七千餘
畝並係膏腴之地見種麻麥相次成熟種下秧苗亦皆廢
壞小民失業號泣盈路兼許浦鎮止係邊江不當海道即
非緊切控扼之地舊年曾經分撥些少防江人船時暫屯
戍其海道自別有要害去處正合分軍屯戍今却全軍盡
在許浦亦未為便其許浦去海約百六十餘里既非緊切

控扼之地而其要害去處又却無備徒使一方田廬墳墓

復不能保伏望特降睿旨施行尋奉聖旨令依已降指揮

疾速打畫圖本申三省樞密院只就許浦立寨

時定寨基東接許浦

太平西接梅里勝法上覽圖喜形天顏謂太平勝法皆佳名也故從其請初水軍元額一萬四

千人分爲四軍八將六十三隊於內分撥三百人江陰駐

劄乾道七年十月奉聖旨許浦御前水軍以七千人爲額

淳熙三年二月馮湛請再招收一千人奉聖旨增額五百

人五年八月于友奏乞增額五百人不拘等仗刺充勝捷

均撥使喚紹興元年四月奉聖旨發到福山寄招梢斫水

手三百二十人併撥到水手一百八十人付司收刺支破

吐渾請給嘉泰四年七月樞密院劄子招募販倭人支破

全分效用請給開禧二年馮拱申海艦百隻水手分布不

敷乞招收三色軍兵五百人又乞招收武藝精熟一百人刺充全效嘉定十五年都統吳英乞增收梢矸水手八百四十人刺充勝捷吐渾與元管兵總以萬人爲額寶慶元年吳英復申本司駐劄許浦分屯列戍管認江海地分頗闊所管隘口惟顧逕最是緊切本司差撥官兵二千人着隘防捍比年以來虜寇侵擾兩淮州郡累蒙朝廷調遣本司兵船前去建康直至江池鄂渚應援防護江面本司兵額雖曰萬人除分屯顧逕黃魚埭江陰寨及楚州管下淮海等處捍禦出江下海外許浦在寨人數無幾每遇調發不免逐急於顧逕二千人內抽差一千人揀用止有千人在戍除看守倉塲庫務軍器支打錢糧外守禦委是寡少今欲措置增招二千人添置左軍內撥新舊軍人相半駐

劄顧逕如或上流江面等處有警便可就許浦調發實為軍國經久利便從之

許浦顧逕左軍

許浦東百餘里曰顧逕與黃魚塢相望轉料角越沙窖拒山東海界淳熙間兵官王輅請留五百人分屯後增五百人又增千人總以統轄然更戍不定至寶慶元年十一月許浦都統吳英始上建屯之議分許浦二千五百人置屯顧逕為許浦左軍以張裕為左軍統制領之

有戴翺記

福山忠節水軍

淳祐九年浙西安撫使趙與憲奏乞於福山魏村江灣處各置戍兵三百人以防江面從之

本縣弓兵

祖額一百六十五名

本縣鋪兵

祖額

許浦巡檢寨

祖額一百四十四名

福山巡檢寨

祖額一百四十四名

白茆巡檢寨

祖額一百四十四名

重修琴川志卷第七

重修琴川志卷第八

叙人

十室之邑必有忠信况環百里之廣耶宰武城者進澹臺令許縣者奇陳寔蓋喜斯地之有斯人也常熟地本荆蠻前乎此蔑可紀矣自仲雍以禮遜爲化子游以文學名科而文物彬彬實表於他郡國然由是而後幾無得而稱焉如宋王敬則之僑處隋管崇之隱居紀載於史時一間見抑何其寥寥耶不然殆有所遺逸歟姑哀所見故作叙人

進士題名

進士登科之有題名亦可謂榮矣近者府庠刊石總曰吳郡登科題名今取吾邑進士析而列之詳而紀之或父子聯芳或兄弟並秀蓋繼此而未已後之覽者豈無羨焉

按吳郡志列進士題名一卷以端拱初元藝識為首然未嘗彪分邑進士之目慶元志雖析而列之年序錯雜無考焉今紀其次

陸景字伯通景祐元年張唐榜終於太常博士孫徽之
陸徽之字彥猷太學上舍生免殿試賜同進士出身終於

開封府濮陽簿

陸綰字權叔寶元元年呂溱榜詳見人物門

張僑字安道皇祐元年馮京榜詳見人物門

子顯孫敏四世孫攀

陸元規字正翁嘉祐二年章衡榜終於承議郎

兄元長

陸元長字

嘉祐六年王俊民榜終於朝奉大夫

張敦字祖仁治平四年許安世榜終於宣德郎贈左太中

大夫子栴

張顏字正甫熙寧六年余中榜終於祕書省校書郎贈中

奉大夫

嚴君鄰字

元豐五年黃裳榜終於選調姪煥

程元允字志行崇寧五年蔡薊榜終於朝請大夫興國軍

倅弟元發

林閱字閱道政和二年莫儔榜終於太常博士

張敏功字守道政和五年何棗榜終於朝請大夫

陳起宗字興祖政和五年何棗榜詳見人物門

錢觀復字知原政和五年何棗榜詳見人物門子俱佃

張枏字材仲政和五年何棗榜終於

林友字德臣宣和三年何煥榜終於樞密院編修官弟友

程元敬字夢良宣和三年何煥榜終於朝散郎

富元衡字公權宣和六年沈晦榜詳見人物門

鄭時字是翁宣和六年沈晦榜詳見人物門

鄭揚字國明建炎二年李易榜終於

王履字用和紹興八年黃公度榜終於選調

王伯廣字師德紹興十二年陳誠之榜詳見人物門

許光國字利賓紹興十二年陳誠之榜終於選調

嚴煥字子文紹興十二年陳誠之榜詳見人物門

吳旼字和卿紹興十五年劉章榜終於承議郎

林友字表臣紹興十五年劉章榜終於選調

錢佃字仲耕紹興十五年劉章榜詳見人物門

冷世光字賓王紹興十八年王佐榜詳見人物門

冷世修字良器紹興十八年王佐榜詳見人物門

錢俱字惟大紹興二十一年趙逵榜詳見人物門

鄒懈字仲山紹興二十四年張孝祥榜終於承議郎

第金宗

趙公豫字仲謙紹興二十四年張孝祥榜詳見人物門

趙思字再可紹興二十四年張孝祥榜詳見人物門

姚愈字次韓紹興二十七年王十朋榜終於御史中丞

鄒企字及之隆興元年木待問榜終於楚州教授

吳兢字子兢乾道八年黃定榜終於承議郎

錢萬選字少張淳熙二年詹駉榜終於選調

第萬頃

錢萬頃字師元淳熙二年詹駉榜終於無爲軍教授

張攀字從龍淳熙十一年衛涇榜詳見人物門

顧叔康字世符淳熙十一年衛涇榜終於通直郎

趙彥适字周伯淳熙十四年王容榜終於刑部郎中知徽

州孫時言

周虎字叔子慶元二年武舉第一人詳見人物門

曹大昌字耆卿嘉泰二年傳行簡榜終於

陶永字永叔開禧元年榜終於選調

趙濤夫字德進嘉定元年鄭自誠榜

趙崇驥字德甫嘉定十六年蔣重珍榜

陶虎字景召寶慶二年王會龍榜

趙時言字子然嘉熙二年周坦榜

人物

前朝

常熟古壯縣詩書禮樂之地自言子游親聖門以來
人才宜不乏而前志所載唐龔景才一人而已其軼
遺既多今欲補記無由故推 朝至今一鄉之望以
示後來名而列之示不私云

巫咸

梁昭明太子招真治碑云境有虞山越絕書云巫咸之所出也

言偃吳人

今索隱曰家語云魯人按偃在魯為武城宰耳今吳郡有言偃家蓋吳郡人為是也

字子游少孔子四十五歲子游既已受業聖門以文
學名科為武城宰孔子過聞弦歌之聲孔子莞爾而
笑曰割雞焉用牛刀子游曰昔者偃也聞諸夫子曰
君子學道則愛人小人學道則易使孔子曰二三子

唐

偃之言是也前言戲之耳孔子以為子游習於文學
見史記列傳禮記檀弓云汰哉叔氏注叔氏子游
別字邑又云申祥之哭言思也亦然說者云言思子
游之子蘇州記云言偃宅在縣治西北吳地記云
宅傍有井井邊有洗衣石周回四尺皆其故物朱長
文志謂之浣衣石輿地志云石
為太守蕭正德持去莫知所在

龔景才字敦禮慶元志曰唐龔景才縣人也五世同居
以孝義稱麟德九年旌表門閭至宋其子孫多居小
山景祐四年有龔沂者登進士第驗其告身乃用兄
潭戶貫又考轉儒林郎告其中有云家屬見居蘇州
乞授兩浙差遣遂調婺州金華縣主簿乃知龔沂實
龔景才之裔也所以吳郡題名闕而不載嘗知瓊州
瓊山縣終於奉議郎

宋朝

陸綰字權叔縣人登呂溱榜進士第綰本名絳字伯厚
見前 同姓名者不道故更今名綰讀書務通理道
根聖人之心著書必本經以救宿儒之弊昆弟分推
先疇而付之捐俸賑族唯恐不給教孤姪猶其子以
此各登科名臨吏則益嚴臨民則益恤奉已則甚薄
奉賓親則益厚嘗提舉江淮茶稅充淮南路制置發
運 運鹽公事終朝奉郎尚書職方郎中贈中散大
夫有春秋新解三十卷工歌詩有聽琴歌等作皆膾
炙人口提舉茶稅時蘇文安洵贈之以詩云君家本
江湖南行卽鄰里稅茶雖冗繁漸喜官資美嗟君本
篤學寤寐好文字往年在巴蜀憶見春秋始名家亂

如髮紛錯費尋理又言欲治易雜說書萬紙君心不可惻日夜涌如水但恐茶事多亂子易中意茶易兩無妨知君足才思見老泉集中龍圖閣學士祖無擇爲撰墓誌

陸徽之字彥猷縣人高才博學邑中推爲鄉先生建中靖國初有詔求直言徽之進對與雍孝聞等力陳時政闕失唱第日皆駁放大觀彗星見復收拾孝聞等徽之已卒

見國史慶元志云太學上舍生免殿試賜同進士出身終於開封府漢陽簿

張僑字安道縣人有聲場屋間嘗作月中桂詩膾炙人口登皇祐元年進士第因言事謫衢州終於朝散郎尚書都官員外郎同年趙清獻并遊從極厚詩筒往來觀其友足以知其人矣清獻嘗有送僑赴闕詩云

君數過子澌水邊從容不覺歲華遷同年契有二千
石釐務官成三百篇兩縣子庭俱戲綵一州僚館競
鋪筵到應禁闥新秋近亟對威顏咫尺天寫之金花
牋墨色如新今藏於家及僑召還復有詩餞行今有
六篇二帖皆諸公遺墨摹刻于山陽郡庠子顏孫敏
功四世孫攀皆登科

張攀字從龍由太學登淳熙十一年進士第初調明之
鄞縣尉楚州教授知建康府溧水縣嚴州倅監登聞
鼓院慶元倅知興國軍除將作監丞太府寺丞祕書
丞詮次中興館閣書目凡萬四千九百四十三卷上
之兼權右曹郎官除尚右郎官改尚左軍器監同日
再命拜殿中侍御史兼侍講在憲府凡兩年除起居

郎兼崇政殿說書卒年七十贈通議大夫集英殿修
撰時嘉定十六年也攀寬厚易直遇事開心見誠無
一毫矯飾幼年群試卽不肯隨衆減年爲欺家世清
白持之益堅仕州縣以循良稱在朝廷以靖共著類
稱爲吉人淑士云有益齋集奏議漢唐論共若干卷
張柟字材仲縣人繇三舍廩貢京師入太學治書有聲
登政和五年進士第初調臨江軍司刑曹事知嚴州
遂安縣方臘寇嚴領兵入邑丞簿尉皆遇害柟與力
戰刃中脅擁入窠穴柟曉以禍福逆順賊聳聽得脫
萬死中賊繼授首改秩知湖州歸安縣臨安府通判
知泰潤衢三州皆以惠愛稱柟天性純孝知衢州日
母卒年九十九歲柟年七十矣執喪甚至人皆賢之

初得郊恩舍子畀姪族有貧而喪不舉者哀而葬之
年七十八官至朝議大夫贈正議大夫

陳起宗字興祖縣人少入上庠連冠多士諸公皆歛衽
避之一日歸省囑同舍生投試卷起宗治書禮記同
舍嫉之輒易以周禮迫試乃告之弗問卽以周禮試
復第一登政和五年進士第年三十七以徽猷閣學
士知并州卒起宗工詩瀟灑有陶謝之風

錢觀復字知原縣人於吳越爲疏屬由太學登政和五
年進士第邑人土著登科自觀復始初調越州諸暨
縣主簿改温州教授終更過瑞安巨寇方臘正猖獗
觀復贊邑令王公濟備禦時流民歸瑞安相屬于道
或議驅出境觀復曰孰爲吾境驅之適資盜耳遂徙

之海洲居焉調湖州戶曹同郡失勦勢方盛以鄉人
故願妻以女力辭不就授楚州士曹衢州判官虜騎
犯江淞衢當要衝觀復白郡守縱民老弱出戶留一
丁不留與留而疲弱不堪任者罪如軍法旣而諸兵
欲乘時爲變顧城中子女無所獲乃止除國子監丞
改諸王宮教授太常丞祕書郎戶部員外郎宮觀起
知廣德軍歲上供民輸送回遠加歛水脚錢請于朝
寄廩湖之四安至國門纔五日費減大半卒年六十
五號正靜居士有文集十五卷論語解二十卷劉待
制一止誌其墓子俟佃

錢俟字廷碩一字惟大弱冠舉於鄉考官徐良能見其
文有本源意必老儒以爲選首及開卷大驚異之繼

補太學生登紹興二十一年進士第授泰州教官除太學正從容學省欽以靜晦人莫窺其際除宗正寺簿太府寺丞宗正丞知袁州除祕書丞著作佐郎遷將作少監除福建路提舉終朝請郎年六十侯平生少嗜好沉冥書史藏書數千卷朱墨精謹皆手自雋校於書無所不讀尤精於易有文集五卷諸經講解十卷易說三卷崔紫微敦詩誌其墓

錢佃字仲耕弱冠入太學登紹興十五年進士第嚴州分水尉池真二州教授改秩除諸王宮教授遷大宗正丞通判太平州太子尹臨安擇寮采佃獨以外庸在選中擢吏部郎中對便殿言三事上稱善累遷左右司檢正兼權吏兵工三侍郎出爲江西路轉運副

使時盜賴文正起武陵朝廷調兵討之佃餽餉不乏
繼使福建再使江西奏蠲諸郡之逋婺州飢闕守上
曰錢某可郡荐飢禱雨鬚髮爲白勸分移粟所活口
七十餘萬政甲一路朱文公熹時爲倉使與陳亮書
云婺人得錢守比之他郡事體殊不同又記江西漕
司養濟院謂其嘗奏免贛吉麻租二千四百五十九
斛兩州之人尤歌舞之今知婺州救飢之政亦爲諸
郡最所以稱譽者蓋若此佃忠信恭寬根於天性臨
政不求赫赫聲以字民爲先務所至得民家不取盈
捐橐裝買田合族名曰義莊卒年六十二終於中奉
大夫祕閣修撰有易解十卷詞租類要二十卷文集
二十卷誠齋楊文節萬里誌其墓

富元衡字公權文忠公裔孫寓居常熟曾祖嚴咸平詞
科元衡幼入太學有聲場屋間登宣和六年進士第
調隨州隨縣簿建炎初爲襄陽招撫司機宜都督張
魏公浚以材薦改秩爲諸王宮教授大宗正丞知江
陰軍嘗辯盜有不應死者全活數十人皆感泣知興
國軍改袁州遷湖南常平使者改利路提刑蜀舊例
監司交餽不下數千緡元衡却而不受改湖北提刑
一以平反爲心隆興中召還中途遇盜行李一空帥
李師顏餽以匣金不啓緘而絕之除工部郎中未幾
歎曰吾清白傳家今不翅足矣上疏乞骸骨詔以內
閣奉祠審訓獎之有行止不殆之語爲堂榜以知止
侈上賜也繼乞休致上嘉其志從之慶禮成賜金紫

卒年八十六終朝散大夫平生清節終始不變喜坡
字尤精柳葉篆

丘礪字師說家海州之朐山建炎初仕于吳因寓居常
熟少讀書刻苦有志事功登政和戊戌第歷維蔡二
州教官知吳江縣入爲國子監丞御史臺檢法大理
寺丞權戶部郎官知筠泰建三州除福建提舉兼提
刑改轉運判官在建凡十年惠政不可勝紀秦檜當
國以礪同年生每示意嚮且欲以孫締礪之女礪實
不願欲遠之乃以兄姊未葬力請祠而歸屏跡杜門
以詩酒自適奉祠凡十二年壽七十六官至朝請大
夫累贈光祿大夫礪天稟純實自律甚嚴更迭中外
三十年田僅數百畝不給則舉質以繼處之裕如有

易說及超然類藁千餘篇杜詩集句百篇子琛應博
學宏詞科璋寧國倅琛提舉福建市舶璠舒之太湖
令諸孫耒將作監丞今四世孫名德相望簪紱蟬聯
金紫輝映閥閱鼎盛爲邑望族

丘耒字少潛以蔭調臨安府於潛簿慶元錄參淮東餉
幹所至有聲知嘉興府海鹽縣興起學宮築捍海堤
二十里代民輸積欠租郡有疑獄率委平反守議賞
輒辭民德其政爭先立碣薦者十有八人監三省樞
密院門遷將作監丞知台州惠州撫州皆不赴終朝
奉大夫年五十六耒生平尚義加厚族黨捐已田以
畀姪尤人所難王忠惠萬狀其行謂天資素高才足
以運慮足以謀明足以察得其實云

曾懷字欽道宣靖公會孫世居泉州後居京師晚寓常熟宣和元年以父任調鎮江金壇簿南渡初授和州烏江令浙西帥幹知嚴州淳安縣濠州太平州通判提舉兩浙市舶知江州孝宗踐祚改真州浙西提舉以懷有應用才除度支員外郎別置拘催錢物所令專行以豐裕聞起除權戶部侍郎兼提領贍軍諸庫除戶部侍郎再歲除尚書在版曹凡五年未嘗以錢穀語人凡錢穀之數州郡所積與夫出納之多寡纖悉必記上以蕭何劉晏目之丐閑除龍圖閣學士知婺州甫三月趣召復爲戶部尚書乾道八年二月賜同進士出身除參知政事九年十月拜右丞相淳熙元年六月除觀文殿大學士宮觀甫及故里復拜右

丞相力疾赴闕上以疾未全愈免赴朝參惟令入堂
治事遇大政則宣引特令製輕小金帶以賜復力上
印綬仍除觀文殿大學士官觀歸僅三月疾復作以
淳熙元年薨于常熟私第年六十九贈少保懷由世
家登宰輔以清約自持爲相侶侶得大臣體常言事
之大者視之以小事之小者視之以無則天下無復
事矣真名言云有文集三十卷

鄭時字是翁縣人樞密文肅公戩之後少魁江東漕登
宣和六年進士第改秩知太平州當塗縣律身廉介
而撫民以寬有訟在庭訓諭不悛而後加罰民多化
之秩滿通判建康府留守晁尚書謙待以君子長
者凡所贊畫言無不從以疾奉祠而歸終於朝奉大

夫公天性嗜書至老不倦自左氏史記東西漢三國志南北史以至韓柳杜樊川東坡諸文集皆手抄編錄下至稗官小說莫不經覽焉

王伯廣字師德縣梅李人登紹興十二年進士第調湖州德清尉既歸里家產遜諸弟一毫不取試教官授溫州教授再調常州教授未赴而卒年五十伯廣少工於文從中書舍人楊邦弼學嘗道過臨安謁張倅材仲張曰試教官乎曰某素不習經張爲指蹊轍閱月以程文示張張大驚曰天材也卽魁教官精於詩四六亦爲人膾炙與張紫微孝祥遊詩筒往復有聽雨集藏于家

嚴煥字子文縣人嘗與同里錢南試聖人以人占天賦

出場問破題押何字南曰押占字煥曰余奪魁君第
二果以首薦登紹興十二年進士第調徽州臨安教
官通判建康府知江陰軍遷太常丞出爲福建市舶
終於朝奉大夫煥長於書筆法尤精

冷世光字賓王縣人與弟世修世南同入太學時稱爲
三冷與弟世修同登紹興十八年進士第調湖州歸
安簿知和州歷陽縣寧國府寧國縣廣德軍教授改
秩知衢州龍遊縣朱文公爲常平使者旁邑令見訴
于民文公命體實世光辭焉文公曰選委也往遂得
其情兩省交薦幹辦行在諸軍審計司除監察御史
遷殿中侍御史條奏忠切彈劾無所避旣而去國奉
祠尋知嚴州丐辭得請旣又引年致其仕作閑適堂

晚歲優游里社泊如也年八十終朝奉大夫世光事親孝居喪哀與諸弟和於子孫盡其教自其父通奉力賑施邑里世光兄弟率行之不替鄉人至今高仰之有奏議彈章

卷東堂類藁二十卷力筆五卷

冷世修字良器登進士第調秀州崇德縣簿太守張瑜異之移攝理掾獄屢空知泰州興化縣辟監行在北外門激賞庫改秩乞改次等官回一階封垂白之母阜陵特命詞以寵之遠近歆豔知建康府上元縣民有互訟者世修諭之曰骨肉爭鬪非美事也今以律繩汝汝終身不可復聚委曲化以恩義民感泣願息爭通判和州守尚峻嚴世修濟以寬秩滿吏民相率走諸臺已留得知南康軍未上曰知足不辱卽丐祠

作留耕堂以示子孫卒年七十三終朝奉大夫有雜文三十卷詞科類要十卷

陳字字伯愛古靈先生諸孫自宜興徙常熟以父臺簿遺澤仕爲興化軍莆田尉得劇賊格當霑賞字愀然曰吾其可藉人命爲自進之階卒辭之調紹興府司法隆興中改秩知臨安富陽縣分羗鎮江府糧料院知潮州提轄行在樞貨務知房州歸卒年六十一字孝友天性廉白無瑕玷居母喪鬚髮盡白撫愛諸弟每食必同席俸祿不入私室家無庾良之器他可知矣常自謂先世以清白遺子孫豈惟富不可求亦所不願也陳紫微峴誌其墓謂內行外治純篤始終允謂成德非諛言云

趙公豫字仲謙自父少師家常熟幼聰警記左氏傳不
謬一字登紹興二十四年進士第調無爲軍無爲縣
尉太平州錄參再調無爲軍錄參福建運司主管帳
司改羗行在激賞北酒庫知臨安府仁和縣兩易紹
興府餘姚縣分羗鎮江糧料院知高郵軍真州常州
提舉浙東常平茶鹽除倉部郎官兼刪修勅令官遷
大理少卿充接送伴金國賀正旦使遷太府卿除
祕閣修撰知太平州江東轉運副使進集英殿修撰
宮觀開禧元年年七十一抗章引年陞寶謨閣待制
致仕嘉定五年卒年七十八公豫沉厚清苦平居以
清坐爲適無毫髮干州縣居官廉正常言吾求爲循
吏不求爲健吏晚歲懸車勇退識尚高遠故宸音褒

獎有察辭避之真情全始終之大節蓋誦其實也有
奏藁一卷燕堂類藁五卷弟公升公頤仕皆至麾節
類有政績可紀云

趙思字再可本洛人寓常熟治春秋登紹興二十四年
進士第調濠州鍾離簿時相虞雍公力薦之孝宗賜
對便殿問恢復大計思對合上意除太府寺簿太常
丞兼度支郎官台州闕守上問誰可任者僉以思對
亟出親札以授不數月治聲翕然上親書姓名於御
屏除淮南路轉運判官兼憲過闕辭上曰知卿忠實
故畀邊節除直祕閣因任陞副使除戶部郎官淮東
總領遷起居舍人充金國賀生辰使不肯稱御名虜
以爲慢來詰朝廷不得已罷之除廣西提刑奏事上

曰朕每愛卿才不令卿遠出改湖州直龍圖閣再任
除起居郎權吏部侍郎宮觀知靜江府廣西經略以
職事修舉除祕閣修撰進集英殿修撰再奉興國祠
累轉中大夫卒年七十內翰洪文敏邁誌其墓

崔敦詩字大雅世家靜海晚僑寓常熟登紹興三十年
進士第主揚州高郵簿兩浙運幹除祕書省正字繼
兼翰林權直早有文名所爲制詞溫潤詳雅兼崇政
殿說書權給事中遭內外艱時翰林學士周必大乞
補外壽皇中批問吏部尚書韓元吉曰崔某今安在
元吉乃具言之既召見除樞密院編修官復爲權直
既拜命卽言翰林權直爲名未正卽更爲學士院權
直遷著作郎兼權吏部郎官又兼崇政殿說書進國

子司業改權直學士院拜中書舍人加侍講直學士
院敦詩賦性端厚議論疏通知大體自直宿遞講遇
引對所陳必剴切至造膝密啓有家人不得覘其藁
者上深所器許九年夏以疾卒年僅四十有四贈中
大夫有文集三十卷內外制藁二十三卷奏議總要
五卷通鑑要覽六十卷制海十編監韻五編南澗韓
尚書

元吉誌其墓

富嘉謀字君美文忠公裔居常熟以祖澤仕調湖州歸
安尉無爲軍判官南安軍上猶縣令監行在省倉上
界特旨弼處州慶元縣以才選知縣事再任臨安府
通判建康分司權轄改行在權轄知饒州改知泰州
淮西運判兼憲倉兩節淮東運判知和州奉祠家居

累年卒年七十七嘉謀才具素優臨政不苟居鄉尤急於義云

周虎字叔子世家臨淮靖康南徙寓于常熟虎個儻輕財而尚氣節慶元二年擢右科第一授殿司步軍同正將除武學諭閣門舍人充金國賀生辰接伴副使知光州楚州繼知和州實開禧二年也時虜會諸道兵加其大帥以平南盪江等號使長驅入寇十有一月至和州虎部分將士乘城以守且語父老曰吾國家守臣一朝去此則爲奔亡之人失節敗名生不如死効死弗去雖死猶生吾計決矣合戰凡三十有四殺虜驍將以十數最後射中其右帥石矧殲死虜氣沮甚大創引去於是和議始堅決而江淮奠枕矣特

轉武功大夫正任文州刺史除主管侍衛馬軍行司
公事特授成州團練使除侍衛馬軍都虞候帶御器
械兼幹辦皇城司弓養提舉佑神觀尋謫徽州得旨
自便復元官自是召命再放除知和州者一特轉行
一官者再遜擯上或至八九必得請乃已家居凡十
有二載紹定二年轉和州防禦使致仕卒年六十九
謚忠惠虎功在江淮忠節鮮儷而文詞敏贍作大字
蓋獨步漫塘劉少監宰誌其墓母何氏以虎和州城
守與有功進封永國太夫人母子俱廟祀于和云
王萬字處一世本婺女後爲濠州定遠人晚寓常熟少
居濠梁學舍者九年慨然有求道之志熟讀論語忽
覺有得登嘉定癸未甲科授和州教授吏部架閣國

子錄添羌鎮江府倅除樞密院編修官兼屯田員外郎知台州除屯田員外郎兼編修尚書改右司仍兼編修崇政殿說書除監察御史時嘉熙三年也會時相有不協公論者於是上疏劾之且引歐陽脩之論趙括謂天下皆知其不可獨其主不悟者最爲莫大之患疏入卽除大理少卿尋改太常少卿知寧國府令赴行在奏事除直寶章閣宮觀再令赴行在奏事依舊直寶章閣福建提刑除直煥章閣四川宣諭使司參謀官太常少卿並累辭不受家居累年凝塵滿席淡如也淳祐三年卒年四十有八五年奉御筆前太常少卿王萬立朝蹇諤古之遺直爲郡廉平古之遺愛可特贈集英殿修撰十二年賜諡忠惠萬聞道甚早

其學由於自得談經析理不涉支離與人交不爲崖
異之行故其蘊蓄深厚人莫得其窺測每書事天二
字以自警盛年而逝不得盡其所到善類咸傷惜之
號抑齋有文集時習編書志編共 卷

隱逸

胡嶧字仲連世爲婺之永康人因祖葬吳下遂家縣之塗崧嶧姿稟澹泊恬於世嗜步趨言動皆有尺度而寘嘉喪祭率遵古法退處于家與方子通林祖德放浪泉石之間居五柳園中松憲蓬戶植竹䟽沼兄弟雍如父子論學二小童供薪水役客至談話終日罕親世故信其爲隱君子也建炎登極特命以官一至銓曹授迪功郎欽州安遠尉而終不仕曰吾老矣姑承朝廷之恩意可也其父稷言作五柳堂至嶧又取杜子美宅舍如荒村之句榜其堂曰如村因號如村老人紹興十四年十一月卒有詩集等子百能奉議郎諸王宮大小學教授

鍾璇字振遠一字叔齊縣人六歲而孤育于繼祖龍圖
學士妙峰林先生適之家妙峯家多書因得縱觀焉
與其孫璟瓌瑑同隸業課率先成後璟三兄弟並登
甲辰第璇遂棄舉子業取所藏書盡閱之侍官天台
一日游巖谷間遇異人僧服手列禦寇書揖而與語
坐盤石指一泓定水曰此水滔滔乃皇極大中之道
語久別去有孫燭湖跋語自是有所省悟益不溺於名利放
浪漁釣間築室梅里所居多蔣香草自號藥圃隱居
閉戶者二十年家雖貧殊不戚戚然有求者解衣分
粟無靳色知建康唐侍郎璩自留守歸寓梅里往見
之遂爲忘年交浙西倉徐常丞誼吳門守沈侍郎揆
皆造其廬以奇人目之范參政成大等嘗薦之于朝

不報卒年五十二有藥園藁山中錄續孔白帖秦漢以來鍾鼎奇字藏於家

周甫字次山縣人幼穎悟五歲誦論語每舉一字輒引類言之淳熙癸卯秋試主文郭頤取爲解魁以失書塗注太守耿秉移嗣榜首遂棄舉子業窮經史百家之書識見超卓文筆凌厲操履益不苟號無礙老人宇文參政紹節館之以邊功累官不就孫令君應時甚愛重之郡人周正字南時亦與訂所疑焉精於漢史所著韓生傳章華臺記石頭城歌等作皆膾炙人口卒年六十二遺文類散佚云

重修琴川志卷第八

琴川志卷第九

叙產

凡志必載其地產甚詳蓋有取乎九州所有皆聚此書之義非專逞博眩奇如茶經蟹志牡丹荔枝譜比也然昔之志南海者以龍目益智二物為一物類不免傳疑於後世則紀述之際又有不可苟者焉常熟有原野之平衍有江湖之涵浸動植生孕厥類實繁即禹貢曰惟職方氏曰宜之例比而載之宜矣故作叙產

穀之屬

吳地宜杭稻玉粒香甘為天下甲其種名不一

穞稬

粒白無芒熟最早

閃西風

八月熟

紅蓮

米之最佳者芒紅粒大有早晚二種陸龜蒙詩曰近炊香稻識紅蓮

箭子稻

此品最高晚熟朱樂國吳門志稱之

香穞米

米粒甚香晚熟着數合餘飯皆

鼠郎黃

鶴鶉斑

雪裏揀

稈軟有芒粒尤大

稻公揀

早晚二種

白稻

早晚二種

稻裏揀

揀出稻

無名稻

已上並杭稻

趕陳糯

抄社糯

未交社先熟

秋風糯

或名瞞官糯
白芒早熟

野稻

赤芒早晚二種

雪裏尋

有芒粒大晚熟

師姑杭

無芒晚熟

顧公揀

舜哥稻

兩重殼如蠅翅

雪裏扮

九節稻

麥爭場

六月熟

矮糯

晚熟

師姑糯

無芒皮黃而光晚熟

青稈糯

晚熟

金釵糯芒粒糯黃有

鐵梗糯信花易落怕風

已上並糯稻

節澳稻早熟或稱珠兒稻

六十日次熟或八

金成土早人或蒸而食之

先禾早熟之禾悞為晚耳乃

已上並先稻

烏口稻再蔣晚熟米

赤穀稻立秋日看如東南風

已上名色甚多姑舉其槩耳

稌有二種黃稌蘆稌

粟穀九重

麥大麥小麥蕎麥

豆黃豆青豆黑豆紫路豆赤豆菽豆白豆可入藥黑豆

薦來紅豆粒大且紅八月白豁裏豆未當豆熟時先

麻油麻可壓油大麻可作乳酪其皮可緝

帛之屬

布

有苧麻二種皆緝其皮而為之

藥之屬

天南星

地骨皮

麥門冬

兔絲子

細辛

紫蘇

薄荷

二種

天羅

黑牽牛

花碧色蔓生籬落間

黃草布

色黃有極細如紗者

半夏

天花粉

枸杞子

鴈鳴子

苾蓐

荊芥

馬蘭

香附子

叢生道傍一名蓂草

車前子

俗呼為蝦蟆衣

羊蹄菜 一名禿菜

菖蒲 生陂澤葉微大

天僊藤 八月取

虎杖 三月取一名苦杖

夏枯草 五月取

穀精草 八月取常熟山出

果之屬

梅 多種

桃 多種

李

梨

柚 大者如甌孟

蓖麻 紫莖子青褐色

決明子 黃花

金星鳳翼草 四月取

金剛根 三月取

鐵腳草 八月取常熟山出

杏

蓮

安石榴 有百葉者

枇杷 舊有無核者出頂山上

林檎

蒲萄二種

三卷第九

銀杏

三

棗

柿多種

瓜多種

菱多種

荸薺

藕

茨菰

重臺碧蓮 出破山寺沼中

櫻桃 出虞山南有酸二種白蠟櫻色如蠟稍大味甘肉厚

方蒂柿 出虞山南有蒂沙者為真在眾品之上如紅

頂栗 出頂山香味絕勝微風乾之尤軟美又有一種曰麝

韓梨 出縣河陽山之北十餘里曰韓村皮褐色肉如玉香

甘無比削之經時不變雖腐壞不糜近年頗難得

蔬之屬

韭

薤

自真者慶元志以為從他處所罕有者

陵諱易曰韓村

蒜

芥

甜菜

波稜

香菜

同蒿

蕨虞山之北有之

冬瓜

黃瓜

茄

又一種出許浦其大如盞味甘

甘露子

胡荽

菰

蓴

生菜

蒿苳

芸臺

苦蕒有二種一種尖葉可羹

葱

生瓜

瓠

蔓菁

斜蒿可煮鯖羹

蘿蔔有一種又有胡蘿蔔

絲瓜

莧

畜之屬

牛

彘

猫

鵝

禽之屬

烏

鸛

鳩

鵲

一種青鳩秋風至

裙帶豆

羊

犬

雞

鴨
有一種名鴨鴨味佳

鵲

鷹

黃鶯

雉雞

鵓鵒

鴿

白頭翁

雀

鉤舟

鷺絲

山老鴉

鵓鵒

魚虎子

翠羽可飾冠梳

偷倉兒

最小飛入倉能食米穀

竹雞

布穀鳥

鴿鵒

噪天子

婆餅焦

啄木

青菜

百舌

山白頭翁

三月為小白頭翁八月為隨鷹子

櫻桃鳥

紅紫白頭黑身

綉眼兒

最小而巧

黃頭兒

最小善鬬

竹嚙

葛公

聲叫之葛公

刺毛鷹

食刺毛又名桑扈

豹頭兒

鷄鷹之類

雪姑兒

野鴨

江鷗

鶩

獸之屬

豺

兔

獺

獐

黃雀

燕子

黃鵠

無黃托爪善食

鵠鵠

獐鷄

海燕

香狸

刺蝟

鼠狼

鼠

獾有二種猪獾可食

鹿

魚之屬

鰕

鯽

鮎

鰱

黃鰭

青魚首有魷古作鯖

鰻鱺

鱧

鱖魚

野猫

虎

鮑

鯉

鱖

鱸

黃鰭

鰻

鼈

鱔

鰻魚

針口

肉貯小而肥

吹沙浪

俗爾雅云鱮沙今吹沙魚是也

蜺

生於泥中本草

蟹

蚌

鰕

水雞

螃蜞

河魴

出楊子江中冬有三種大曰河魴正月以後有之次曰

班兒又次曰吳江者曰南江月有之本草云肝有毒食

忌風藥出有梅聖俞詩云春洲生荻芽春至江鄉則

橫鯊

或出楊子江與其河魴同時里親舊

黃尾鯊

出楊子江四月有之其子又曝為乾俗呼

鱠殘魚

出楊子江清明時有之俗謂吳王所鱠狀如鱣其餘味

淡出湖中四時有之其甚小者則曰銀魚

又有一種曰鱣魚狀如鱣其餘味

鮓魚

出揚子江肥美四月有之

鮠魚

夏初有之坡翁所謂粉紅石首雪白河鮠是也

脆鱸

出揚子江亦曰鱸皮肉俱脆夏初有之

黃魚

出揚子江

鱖魚

出揚子江

鯊魚

出揚子江有沙用湯浸而食之

蛤蜊

出揚子江本草蛤蜊煮之醒酒毒止渴開胃性冷服丹人不可食

白蟹

出揚子江

車螯

出揚子江

蝾螈

出江中

沙筍

箬魚

如箬之薄出江中

赤魚

形如金鰻俗謂之老鴉魚出江中

赤眼魚

蝻

橫魚

細鱗骨多肉厚

橘踰淮而北為枳地產各有宜也吳中地沃而物繁原隰湖海之所出未易枚舉志曾不一載朱樂圃續吳門志雖載物產然包舉全吳匪可吾邑故為表而出之云

琴川志卷第九

琴川志卷第十

叙祠

古者有功德於民則祀之故無淫昏以惑世而誣民今列于祀典者未必皆有功德也而山巔水涯捧揭而奉之者尤衆焉乃若梵宇道宮金碧相望而不耕不蠶之民蟠據其間者類悠然自得可勝嘆哉常熟百里之地祠僅十一棲羽流者二三萃縑徒者五六不爲不多矣而要皆以保國安民爲名則不可得而廢也其建置之由因革之故廢興存亡之異則當各紀歲月以備參攷故作叙祠

廟

城隍廟在縣治西十步古者諸侯旣立社稷又爲五祀曰司命中雷國門國行公厲是也鄭氏謂國門爲城門今

之城隍也然今州縣所祀如吳之春申及永嘉之周苛
天台之屈坦興國之姚姪亦不一槩焉嘉泰四年因遭
回祿是歲重建

東嶽行祠在縣治西一里五十步虞山南麓依山高聳規
模雄偉歲久摧圯屢雖再新然創造之由無碑誌可攷
東平忠靖王祠在其東偏按王淮陰人張有嚴之子唐
開元元年八月十八日生十四年七月二十五日入
滅爲神護國救民封成濟侯宋太祖親征太原川水
泛溢上憂之冰忽合師遂濟空中見神來朝加征應
護聖使者熙寧五年陞濟物侯宰相王荊公令有司
勘會靈顯事跡再封忠懿文定武寧嘉應侯南渡以
來神復響答於浙間而此方尤顯著累封東平忠靖

王邑人尊事之殿基舊卑隘淳熙九年重建

正順忠祐靈濟聖烈王殿在乾元宮三清殿之西先是淳熙間邑人迎神像塑於乾元宮山門之東偏湫隘淺迫不足以妥靈紹熙癸丑邑人靡金錢建殿宇湖山相映翼神之休祈禱輒應

累朝勅封在廣德祠山廟靈跡尤著

東殿聖王廟在縣治東北一里三十步莫詳建立歲月慶元志稱爲子游舊廟然無所考

白龍祠在縣西北頂山之上世傳梁天監元年有村姥姓蔣氏居山之東因有異感孕而生白龍失所往三日龍歸若就乳姥怖而死卽所居葬之旣而大雷雨冢遷于山腹歲之五月龍率來省或見形山間始至必甚風雨旣留則一境爲之寒邑人於此候之唐貞觀十年龍嘗

鬪黑龍于海虞山之東邑人因像事龍母子于破山寺

西澗旁水旱禱焉咸通十三年令周思輯就爲廟貌以

祀之見皮日休記宋太平興國四年令蔣文懌復遷而歸諸

頂山寺重建祠宇見蔣文懌及陸詔之記政和二年賜廟號煥靈

五年令朱彥求請于朝封宣惠侯遷其祠于山腰龍池

之上紹興壬申加封通濟卒已逆亮犯順御降祝文以

禱時李寶奏海道之捷旣而獲裨將倪新殷簡二賊昌

言於衆曰當戰之時有大龍舟旗幟皆白上植一認旗

書海虞山龔皓俄風濤大起虜舟皆不能自制遂爲所

勝衆因悟龔乃龍字皓者白色蓋龍助順云淳熙元年

加封靈澤紹熙甲寅歲令葉知幾以雨暘響答聞諸朝

加封靈澤宣惠通濟孚應侯嘉定十一年令趙崇憲復

以禱旱而應請於朝加封為靈澤宣惠通濟孚應廣利

公母為靈順慈穆顯祐普應夫人且為亭軒以嚴禱賽

之所見趙時自是邑人奉事愈加虔謹云紹熙甲寅春

五月殿院冷公世光閔焉率同耆紳禱龍于慧日以繼

邑官之後越五日雨未降冷公夢白衣老人嘆曰諸公

即日龍也水其誠我則夜以度其身公問老人為誰答曰我

人指曰可取矣公倏然寤因作偈曰閔雨而禱非誠莫

通龍感至誠盡力其中我獨何人應之以夢願言施澤

風起水湧徐覺窓紙皆鳴甘雨驟至終日以夢願言施澤

然公嘗記其事邑令孫應時下車未幾苦旱亦迎禱于

慧日五月九日龍見空中當寺西尚湖之濱其色如雲

正黑爪足時露而尾垂屬地可數十丈蜿蜒卷舒色如

霜雪疎雨隨洒既隱復見可數人謂孫令誠禱所致自

東嶽行祠在縣北四十里福山至和七年魏邦哲為之記

以為福山離宮經始於至和之初每歲季春嶽靈誕日

旁郡人不遠數百里結社火具舟車齋香信詣祠下致
禮敬者吹簫擊鼓揭號華旗相屬於道又載父老之語
肇祀之日有幅畫乘潮而至乃嶽神像居民欽祀而加
信焉而李薰爲之記則謂創於至和增大於元符福山
卽古之覆釜唐之金鳳山也二記所載大畧可觀廟貌
威嚴禍福顯應有胡子文者因醉侮慢善惡判官神怒
追之事見內翰洪景盧夷堅志

吳王夫差廟在縣西二里虞山

吳郡志云夫差廟今村落間有之茲其一歟

越王句踐廟在縣西北七里虞山二廟並熙寧間道士李
則正建議者以爲滅吳者句踐也實爲吳之深讎不應
廟祀于此當徹去之

春申君廟在縣西南三十六里練塘市

要離廟在縣西南四十里歸政鄉

徐偃王廟在縣西四十二里永春鄉

鄉名未詳

舊經以爲偃王

失國而亡至膠山而終遂立廟于此按韓愈記徐子章禹旣執於吳徐之公族子弟散之徐揚二州今揚州之境多有廟豈亦因其公族子弟所至而然乎

莫耶廟在縣西南二十里莫城

靈惠廟在縣治東南百步本縣土神周太尉之祠神姓周名容生而事母至孝歿而告母曰兒已爲神當輸忠朝廷盡力鄉里宋淳祐初邑人鄉貢進士陳權簿建祠祀之後報慈寺僧耀觀主增置寢室奉神父母像于廟淳祐十二年壬子進士趙必錦等奏神靈跡勅賜廟額牒文尚存

橫涇東嶽廟在縣東南一百二十里宋咸淳十年里人國
諭張士元建以爲一方祈福之所

寺

慧日禪院在縣治西稍北九十步梁吳興僧慧嚮姓懷氏造大寺三在淮南曰慧照崑山曰慧聚常熟曰慧日今慧聚有碑存焉天監初爲十方禪林老宿相傳謂三錫勅額曰壽聖曰晏安大中祥符元年勅賜今額舊經乃謂本常平禪院未詳其故常熟叢林之盛此居其首居闌闌中而有山林瀟灑之趣紹興十五年一夕煨燼自乾道淳熙歷慶元嘉泰以至嘉定增葺始備歲入亦增益僧徒常數百人遂爲一方名刹矣

崇教興福寺在縣治東稍北二百步建炎四年建寺基本沮洳池僧文用者善風水謂此邑客山高而主位低請立浮圖以鎮之令李闔之深然其說遂令建塔功未及

半而文用死俗呼爲塔院

壽聖東靈寺在縣治西北一里梁大同中建見鍾樓記唐嗣聖

二年爲中興寺元在吳縣界神龍元年賜今額移於今

所宋熙寧六年重修見陸微之莊田記有子院曰延福教院梁

天監中建宋端拱中重建

天寧寺在縣治西北二百五十步梁天監二年建今爲尼

寺寺有康僧大師極靈驗相傳云有漁者夢一僧謂之

曰我卽康僧也可迎我於天寧漁父以告邑中緇徒皆

俟於海隅但見一木浮沉於波濤之間不可近惟天寧

得之因刻爲僧像奉以香火今不知幾年矣邑人祈求

男女多驗

齊樂寺在縣治西二百步梁大同二年建今爲尼寺

報慈教院在縣北五里崇寧二年建內有十六觀堂久廢

寶祐二年邑寓趙雲安崇驥重修仍置田給之

破山興福寺去邑九里齊始興五年邑人郴州刺史倪德
光捨宅爲大慈寺至梁大同三年改興福寺飛泉石橋
修廊複閣氣象雄古多唐時屋也僧堂三柱各有神書
數字相傳唐初雷震故然皆倒書奇恠不可識門外二
老松如虬龍屈蟠異甚庭有瓔珞樹尤古左開花右結
子池產重萼千葉白蓮芳色異常有唐懿宗賜鐘文云
唐咸通九年歲次戊子正月二十一日勅賜破山興福
寺鐘一口重一千三百六斤破山之名舊傳正觀中有
老宿在寺說法常有白髯老人每旦必先至一日師問
爲誰曰某山中白龍也師願見其形老人云我見形時

當念摩訶經號助我之威師怖誤誦揭諦神呪神以杵
擊龍龍衝山而去遂成破澗又略高僧傳云白龍與黑
龍交勇衝迸成蹊朱長文志云正觀中山中嫗生白龍
與一龍鬪於此而成澗則又與白龍祠事相涉三說未
知孰是寺有四高僧祠唐之懷述字體如吳人常達字
文舉邑人宋梁彥偁邑人宋晤恩邑人其彥偁者壽九
十九歲戒行清苦一夜登閣有虎中箭咆吼于地師徐
爲拔之虎偃伏瞑目舐血而往至曉獵師朱德者尋蹤
至師示以矢鏃朱感悟爲罷獵有碑存焉自唐以來名
人才士留詠百數寺有通幽軒空心亭蓋取常建詩中
語也詩見題詠門朱長文志云有文舉塔體如塔皆高
僧有宗教院雍熙中高僧晤恩修天台教於此今廢

塔常達字文舉隱此山雖王侯莫得見之體如塔僧懷述字體如也

光明庵興福寺之屬院也熙寧辛亥僧海素經始紹聖間增建在山腰龍鬬澗之上最爲勝絕望之縹緲若仙居僧仲殊爲之記陳徽猷起宗亦有宿光明庵詩

顯親資福禪院在虞山之北巔上本名石屋維摩庵中有石井名湧泉淳熙三年曾丞相懷家請爲功德院勅賜今額

頂山廣福院在縣西北十八里虞山北嶺下梁大同十二年石史君回舍宅名頂山院至宋治平四年改賜頂山壽聖院後又改今名景祐間太常博士陸景有頂山十詠曰烏目山桃花澗翠珉橋羽客臺萬歲石石門庵白雲泉碧薜園龍母池凌雲徑今所存一二耳白龍祠正

與寺相對

上方院在頂山寺右小嶺之外夾兩山之間其前積石坡陀杉竹幽翳澗水湍激醒人心神寂爲虞山佳處范文正公嘗有詩遺僧至師刻石在焉院有觀音像嘗有光異劉御史拯爲邑令時記其事邑人尊事之遇水旱必與龍母及龍像偕迎至邑寺禱祈嘗有應院有白龍泉清甘不竭舊有白鰻隱見其間今少見之矣

瑞石庵在頂山之巔上方院之右幽深峭絕竹栢薈蔚宋明道元年邑民陳氏築庵延僧守常居之治平丙午縣令向公宗旦命僧慧安繼其後尚書祠部員外郎錢藻爲之記侍郎王琪主簿陳珏皆有詩今爲參議虞公似平墳庵有令孫應時詩

中峯庵在頂山之南峯

寶嚴院在縣西十八里虞山之西麓所謂倚山面湖秀列

屏障者也梁天監初建舊名延福禪院唐會昌中廢宋

端拱中再行葺治天禧中邑令胡順之飛章上請改賜

今額當錢氏霸國時有希辯禪師棲處此山以名聞及

錢氏納土隨詔詣闕賜號慧明大師歸隱舊刹錢氏復

施金五百兩造七級浮圖淳化中太宗詔賜急就章道

遙詠祕藏詮太平聖惠方李堪修造記仁宗朝賜銅鑄天齊

仁聖帝像爲伽藍而增葺始完備矣見邑人陸絳記有李堪嚴煥王伯廣

詩有子院曰泗州院

淨慧禪院在縣西南三十六里練塘市舊名仁王見程堯

開寶中鄒知邈知造施地爲之大中祥符元年賜今額

見夏之
文記

志卷第十

觀音教院在縣西南五十里楊尖市政和五年建

妙清院在縣東南二十里莫城陳禎明二年建

吳塘接待院在縣南五十里建炎間建

勝法寺在縣東三十六里梅里鎮唐元和中閣將軍舍宅

爲之乾元元年置爲離火宅寺晉開運中改爲境寧宋

大中祥符元年勅賜今額至和初更爲禪院

初閣將軍舍宅爲寺而不著其名今爲寺之伽藍神極

靈異士大夫有携家以居者必有虬虺見之箱篋牀蓆

之間以是不敢久居寺之東有冢在焉歲時寺僧如家

人禮設蒲饌以祭寺之西北隅有洗馬池池之側有小

塚蓋其劒甲云有參政李光尚書員外郎陸絳詩又有

石林先生所作輪藏記皆刻而龕之廡下

延福禪院在縣西一十三里虞山嶺下梁大同三年置祥

符圖經

法解寺在縣東七十里許浦鎮舊名泗州塔院隆興元年

浙東西泰海州江海制置李寶申請遂移端委鄉中沙

村廢寺額於此

法解寺元係唐會昌元年里人陸殊等舍地為寺賜額法解

能仁寺在縣東一百四十里崇寧五年建

萬壽寺在縣東一百四十里甘草市

聖像寺在縣東一百一十里陸河市始吳僕射徐真捨宅

為寺晉建興二年得泛海二石佛像奏請今額宋嘉祐

八年朱肱重建僧仲殊為之記

褒親崇惠寺在縣東南七十二里

係宋靖懿帝姬殯

所政和七年賜額

明因禪院在縣東南七十二里支塘市舊曰永昌乾元中廢咸通中始復遂爲再昌寺宋祥符元年改今額熙寧

六年遂爲禪院

見陳記

廣安寺在縣東南一百里直塘市唐乾元初建爲寶林寺宋祥符元年賜今額紹興六年僧了悟舍房基建塔開鑿地宮獲塼銘有長安二年瞿像寶塔之字乃知唐武后時嘗建塔于此塔成因以瞿像名之以表其異乾元初有簡大師者領二大來游卓庵於此插竹林以布護籬落忽爾鬱茂後遂成林

靈寶寺華嚴禪院在縣東南一百二十里塗崧市唐乾元

初建

法輪寺在縣東南一百十里晉咸和六年有雙龜化爲雙鳳騰飛號曰雙鳳宋大中祥符元年勅賜今額

智林寺在縣東北六十里李墓唐乾元元年建爲永安寺咸通二年改易幢塔至周顯德中得州符鼎新之詳見元祐二年結界記宋大觀四年爲犯宣祖陵名改爲今額寺舊在岡身父老云所撞之鐘近或不聞而多應於李墓一方之地其鄉人議之曰此地豈有緣耶遂徙其寺於此至今舊寺傍有涇曰寺涇其址巍然尚存叅政李公光爲令時嘗遊寺有詩寺有高僧曰了通嗜酒不以袖撲滅火自稱曰智林寺了通和尚明日衆詣智林爲謝適了通醉力辭無之旣而沐浴告逝問寺衆曰我

去汝等欲無事耶欲有事耶衆曰願無事遂盡火其寺
壽聖晏安院在縣東北七十里許浦鎮陳禎明三年建本
名晏安禪院宋治平四年勅賜今名

大慈寺在縣北四十里福山鎮梁太清元年建或謂天監
中爲法水禪院宋大中祥符元年賜今額中遭回祿焚
毀殆盡近始鼎新焉傳聞海中有巨木蕩漾其間他寺
欲求而不可惟大慈一禱得之遂以爲僧堂巨棟標之
曰泛海梁至今尚存

永慶寺在縣西北四十五里河陽鳳凰山梁大同二年置
結界記云梁侍御史陸孝本捨宅爲寺至宋政和四年
甲午經五百八十七年始乞奏名大福寺至大中祥符
元年九月內改賜今額有碑存焉故老相傳有僧肉身

泛海而來狀貌奇古僧徒迎而置之寺固以膠漆奉以
香火至今存焉遠近求男女者多驗其碑瘞之鐘樓下
上塑鬼神之獐惡者以護之今不可得而見之山絕頂
有天然石井一蓋泉穴也廣二尺泉清而甘雖大旱不
竭鄉人目曰聖井樵牧者戲以土石窒之今所存無幾
寺之庭有八檜皆數百年之物交締樛結如翔龍怒虬
一夕雷震其西南一株撇其枝附著它榦旣與本體離
絕爲二而其青青猶故是謂寺之三絕祕書丞李堪常
有詩溫郎中革字彥機來遊亦有詩

法輪寺在縣西四十五里志山嶺下紹興九年移於今所
淨居院在縣西北八十七里慶安鎮梁大同二年建爲尊

勝宋大中祥符元年賜今額

見知制誥錢
易經藏記

法寧教寺在縣東北三十六里東花莊宋端平三年平江北禪寺住持僧如珪建嘉熙四年僧居簡爲之記

泗洲殿在縣東一百一十里下陸河要道中吳赤烏二年僧達法師建累遭兵燹宋嘉泰四年里人崔七朝奉捨宅遷建係聖像寺子院

妙相經堂在縣治東南二百步宋咸淳元年本邑道人李淨修買地創建

宮觀

致道觀舊名乾元政和間改今名在縣西一里虞山南嶺下梁天監二年建舊志載漢天師十二代孫張裕在此山修道白日仙去而梁昭明太子碑則曰張道裕朱長文吳門志載張裕先生來此山棲遁十餘載夢神人告曰峯下之地面勢閑寂可以卜居裕如教興葺號曰招真後改曰乾元梁簡文帝嘗賜玉案一面鐘一口今梁殿尚存規模壯麗材植雄偉紫微殿後尚有煉丹井舊傳治平中主觀道士李則正浚井得石函一中有綠合合藏丹二粒卽化爲雙鵠飛去縣令陳照鄰持其函以往而綠合爲則正所藏則正善醫至藥所不療者則以水煮合以飲之疾必愈自則正死而合不知所往矣其

丹或至夜陰晦若有二炬遊走湖市倏忽無常紹興初
人猶每每見之照鄰嘗有詩云鍊丹井存瓊甃古驂鸞
人去玉堂空觀西北嶺上有凌虛堂旁俯萬瓦下瞰平
湖先名望湖不知創自何年亦邑大夫尋勝行樂之地
今之名蓋取僧仲殊下壓凌虛萬象閑之句也宋御筆
下州軍
宮觀三十間以上及圖經所記洞天福地未有額者許
監司保奏取旨賜額本府保奏此縣乾元宮有屋一百
三十間著在圖經宣
和七年勅賜致道觀

乾元宮在虞山之巔始名竹林庵後改招真庵在致道觀
之北嶺上宋元祐中海陵徐神翁之弟子申先生欲南
遊請於師師曰逢虞卽止無雪卽開申遂渡江至是山
徘徊瞻眺久之問於人曰虞山也卽築庵居焉然患無
水一日大雪唯山坳不積浚之得美泉至今雖旱不竭

庵成一日申公不知所往繼之者累加增葺今堂宇煥
麗林木茂鬱遂成壯觀紹興丁卯中道士喻抱元增築
改名招真庵見康舉之記淳熙間邑人以致道舊額乾
元宮之名請於郡改今名宮門之外有一亭名極目極
雄偉邑令何究所創面勢寬閑平野一望數十里姑蘇
崑山無錫諸山屏列又有兩湖居其左右實爲一邑勝
槩之冠初山路犖确躋攀艱險道者胡道堅募緣自教
場西山趾以輓甃砌直達宮門路始夷坦登陟便之遐
望如白練界山善風水者顧謂弗宜嘉泰壬戌有邑民
挾鬼神事走白集撰趙公豫於是度材鳩工卽山腰跨
路立亭厭勝之自有碑記載始末

清真觀在縣治西一百五十步梁普通四年建舊爲女冠

之居今廢

真武道院在許浦鎮乾道間都統馮湛建嘉定丁丑都統

吳英徹而新之

崇真道院在許浦鎮紹熙三年都統劉震建未幾江潮浸
齧嘉定十年丁丑都統制吳英卜基於舊址之南重新
創造嘉定十七年甲申陞爲洞晨觀

至和道院在縣治西二百步宋咸淳辛未天台高士應梅
所創建

棲真道院在縣東北七十里許浦鎮宋嘉定五年壬申高
士周智靜建

延真道院在縣東南一百二十里塗崧市宋嘉定十六年
癸未前平江府檢察宗室尊長趙伯建

頤真館在梅里鎮南申道人煉丹之地有煉丹井與虞山
招真福山潛真爲三真云

潛真館在福山鎮亦申道人煉丹之地

冢墓

吳仲雍墓史記索隱吳地記曰仲雍冢在吳鄉常熟縣西海虞山上與言偃冢並列太平寰宇記曰常熟虞山有仲雍齊女墓東是仲雍西是齊女梁昭明太子招真治碑云遠望仲雍而高墓蕭瑟傍臨齊女而哀壟蒼茫今碑刻尚存而墓不知孰是

齊女墓吳越春秋云吳太子娶齊女女思齊而病將死曰必葬我於虞山之巔以望齊國闔閭傷之如其言葬虞山之巔

周章墓按郡圖經周章闔閭長子墓在海虞山上言偃墓

黃香墓在梅里鎮黃香字文疆江夏安陵人性至孝詳具

東漢本傳乾道初梅里有蘇忠翊直上葬得古冢乃黃香墓碑刻皆隸字首兩句八字中二字不可識

博藏孟光貞其碑陰乃會稽東部都尉張紘誅又有薛

定夫吳

綜修祠日月題刻其可辨者八字

子瓊孫琬位登三事

蘇氏挈歸

于家夜有光怪昇棄崑承湖中

瞿硎先生墓慶元志云在直塘市市有寺曰廣安一日浚

塘得古冢墓塋稱瞿硎先生字鵲子廣川人隱居不仕

葬于東陵武丘寺重岫之原武安蓋廣安舊額今其地

尚多瞿姓晉書隱逸傳瞿硎先生者不得姓名亦不知

何許人也太和末常居宣城郡界文脊山中山有瞿硎

因以為名焉大司馬栢溫嘗往造之既至見先生被鹿

裘坐于石室神無忤色溫及僚佐數十人皆莫測之乃

命伏滔爲之銘贊竟卒於山中此正猶孫叔敖史失其名得其碑乃知名饒叔敖之名由是以著瞿劭亦近此蕭天子墓慶元志寶嚴寺之東丁家灣之西故老相傳云

蕭天子墓墓上有古木樵牧不敢近不知何帝也按江

陰志蕭天子墓在長信鄉有大土封號倉堆相傳爲蕭

天子墓又按梁史梁敬華爲江陰王殂蕭季卿嗣陳大

建二年除侍中淳于氏就季卿買梁陵中樹皆坐免卽

此觀之墓亦有自矣或謂蕭天子墓不應在此按唐史

等皆執弟子禮號蕭夫子存嘗爲常熟縣主簿其父死

或葬於此地不可知恐是蕭夫子墓訛夫字作天字耳

然史謂穎上客死汝南又未知果葬於此否也姑備所聞以俟博識

李墓在縣東南四十五里慶元志云父老相傳吳越錢王遣將梅世忠李開山屯梅里吟開山卒葬於其旁十八

里故曰李墓今土人或謂之李王墓其土堅緻如石斲之有聲

陸丞相墓在開元鄉岡下村墓左有涇曰大墓浜昔村民浚涇嘗得朱漆板古刀錢鏐牌未知丞相爲誰也